

Protocol no. 122**Sezzüda da lündeschdi, 28 december 2011 – 20.00 – 22.30**

Preschaints: Jon Carl Rauch; Chasper Alexander Felix, Georg Salomon, Marianne Werro-Lehmann, Jachen Andri Schmidt e Claudia Luppi (protocol)

Protocol

Il protocol no. 120 da la sezzüda da lündeschdi, 14 november 2011 vain approvà.

1077 9 FINANZAS ED IMPOSTAS
Pè d'impostas pel 2012

Pel preventiv dal 2012 ha il Cussagl cumünal da propuoner a la radunanza eir il pè d'impostas. Il tema dal pè d'impostas es gnü discussiunà eir illa sezzüda cumünaivla dals duos Cussagls e da la cumischiun sindicatoria, sainza cha las posiziuns sajan però statta cleras e chi saja gnü fat üna proposta concreta. Avant ün on ha la radunanza decis da sbassar il pè d'impostas per 15% sün 105% da l'imposta chantunala. Quist pass ha per consequenza chi nu mancan al Cumün be 15% da las entradas da las impostas dimpersè chi mancan impustüt eir las entradas our da l'egualisaziun dal Chantun chi importan tanter frs. 130'000.-- fin frs. 170'000.--. Davò cha'l Cussagl cumünal s'ha occupà fich intensivmaing cul plan da finanzas e cul plan d'investiziuns pels ons 2012 – 2016 chi prevezzan investiziuns considerablas ma eir necessarias, füssa tenor il Cussagl cumünal irresponsabel da na render attend a la radunanza cumünala sül fat cha'l pè d'impostas actual nu s'affà culla situaziun finanziaria chi sarà da preverer pels prossems ons pel cumün da Sent. In vista cha'l Cumün ha da far bleras investiziuns indispensablas eir be per accumplir ils dovairs elementars invers la populaziun, decida il Cussagl cumünal unanimamaing da propuoner a la radunanza da dozzar il pè d'impostas darcheu sün 120% da l'imposta chantunala. Quista decisiun vain tratta our dal motiv da respunsabilità invers la populaziun ed invers il nouv Cussagl in considerond cha'l Cussagl nun as renda cun quai tant popular.

1078 9 FINANZAS ED IMPOSTAS
Peventiv pel 2012 a man da la radunanza

Sün basa d'ün pè d'impostas da 120% da l'imposta chantunala müdessan eir las cifras dal preventiv pel 2012 in congual cun quellas preschantadas illa sezzüda da preventiv cumünaivla la davomezdi. Intant cha cun ün pè d'impostas da 105% da l'imposta chantunala füssa da calcular cun entradas da raduond frs. 7'770'000.--, sotridas da bundant frs. 7'976'000 ed ün s-chav da frs. 197'000.--, as pudess calcular cun ün pè d'impostas da 120% da l'imposta chantunala cun entradas da raduond frs. 8'146'000.--, las istessas sortidas da bundant frs. 7'976'000.—però cun ün vanz da bundant frs. 170'000.-- Il Cussagl cumünal decida perquai da preschantar a la radunanza il preventiv sün basa dal pè d'impostas da 120% da l'imposta chantunala.

1079 800.364

Miglioraziun

Electrificaziun da la stalla da A. e N. Buchli

In connex culla 20avla etappa es prevista eir l'electrificaziun da la stalla da la famiglia Not ed Anna Barbla Buchli. Cun trattar il credit davant radunanza as vaiva constattà cha la dumonda da l'attach da la lingia electrica vi da la rait electrica nu d'eira scleri a satisfacziun. Perquai as ha convocà üna sezzüda culs pertocs chi ha lö il prossem di. Il capo sco rapreschantant dal Cumün a quista sezzüda vuless savair dal Cussagl cumünal che posiziun ch'el vess da rapreschantar. Il Cussagl es da l'avis cha per schoglier eir per l'avegnir il problem da l'attach culla firma „Frars Buchli - impraisa da fabrica“ sco possessura da la staziun da trafo e da la lingia chi collia il trafo culla rait electrica, saja in prüma lingia da pisserar cha la staziun da trafo e la lingia vegnan in possess dal Cumün. Quai simplifichess eir ulteriuras trattativas a regard la rait electrica dal Cumün. Il predsch da cumprita da l'infrastructura electrica oura Pozzet stuvess però as basar sülla stima d'ün perit independent.

1080 070.503.04

Chasa cumünala Misoc

Plazza da pedel – Publicaziun ed elecziun

Tenor il protocol no. 119 da la sezzüda dals 7 november 2011 d'eira previs da scriver oura la piazza da pedel per la chasa Misoc i'l Mas-chalch. In vista cha'l temp d'uffizi per la majorità dal Cussagl cumünal actual va a fin la fin december e cha l'elecziun dal pedel gniss insomma surdat al nouv Cussagl, es il Cussagl cumünal da l'avis da surdar güst eir amo l'incumbenza da scriver oura quista piazza al nouv Cussagl per cha'l profil giavüschà possa gnir formulà e publicà da quel organ chi elegia il pedel.

1081 021

FABRICA

Domenic Augustin – Detaqls lobgias, fanestras implü e detaqls fatschada, Plaz

Tenor il permiss cha sar Domenic vaiva survgni pel fabricat da la chasa in Plaz d'eira mis cundiziun chi vegnan amo dats cuntschaint ils detaqls a regard il material previs per las lobgias ed ils detaqls a regard la culur e la concepziun da la fatschada. L'architecta dal proget ha uossa inoltrà ils detaqls e fa implü la dumonda da pudair realisar amo trais fanestras implü aint il tet. Il Cussagl cumünal conceda il permis per far trais fanestras implü aint il tet.e pels detaqls da las lobgias e da la fatschada.
La taxa da trattamaint importa frs. 50.--.

1082 021

FABRICA

Georg e Cejana Lutz - de Aquino, Stron

La dumonda da fabrica inoltrada da 2007 e las prolungaziuns scroudan. Il Cussagl decida cha per pudair fabricar oura inavant la chasa a Stron ston ils patruns da fabrica inoltrar üna nouva dumonda da fabrica. Implü ston ils puntins gnir rumits subit.

1083 021

FABRICA

Andreas Ovenstone – Saiv da üert, Plaz

Avant ün temp ha sar Ovenstone strat giò la saiv existenta chi as rechattaiva tanter sia parcella e la via chantunala. Causa ch'el nun ha sgürà giò in scrit la posiziun da la saiv avant co tilla strar giò, po quella uossa be gnir refatta schi vegnan tgnüts aint las distanzas tenor la ledscha da fabrica. Co chi guard'oura es sar Ovenstone landervia da refar la saiv al lö ch'ella d'eira. Causa cha sar Ovenstone es bainschi in possess d'ün permiss da fabrica per la renovaziun da sia chasa ma na per la refabricaziun da la saiv, decida il Cussagl cumünal da til giavüschar d'inoltrar la dumonda da fabrica per refar la saiv. Las parts da la saiv chi sun fingià construidas sainza permiss ston gnir levadas. Üna saiv nouva sto tgnair aint üna distanza da 50 cm davent da la via e das-cha avair ün'otezza da max. 150 cm. La vasca da meteor sto gnir sbassada sül nivel da la via chantunala.

1084 72

ALLONTANAMAIN D'IMMUNDIZCHAS

Nouv concept da ramassamaint - Containers d'affar

Sülla publicazin dal nouv concept da ramassamaint d'immundizchas aint il Mas-chalch dals 25 avuost d'eira entrada üna petiziun chi mettaiva in dumonda la cumpetenzza dal Cussagl cumünal a regard l'organisaziun dal ramassamaint d'immundizchas. Il Cussagl cumünal ha scleri quista dumonda cul iurist dr. Peder Andri Vital chi ha attestà al Cussagl cumünal la cumpetenzza d'organisar l'andamaint da las deponias d'immundizchas sco eir il ramassamaint da las immundizchas. Adonte da la resposta dal iurist ha il Cussagl cumünal provà da far alch adattamaint vi dal concept per quella part chi pertocca ils containers d'affars per gnir per part incunter als petents. Ils petents han survgni la resposta dal Cussagl cumünal a temp ütil. Per comunicar eir a la populaziun ils adattamaints fats, decida il Cussagl da publicar il seguaint text aint il prossem Mas-chalch:

„Daspö ils 26 avuost 2011 sun in vigur be amo las trais deponias principalas Tuols, Plaz e Davo Stron. Grazcha a la fich buna collavuraziun dals abitants da Sent s'ha quista part dal nouv concept d'immundizchas verifichada bain. A partir dals 1. schner aintra in vigur amo il nouv möd da ramassamaint dals containers d'affars. In connex cun üna petiziun entrada a regard il concept d'immundizchas, ha il Cussagl cumünal repassà ed adattà la part dal ramassamaint dals containers d'affars. As basond sülla resposta datta als petents vules il Cussagl comunicar il seguaint adattamaint: Per pudair inchaschar ils cuosts per laschar svödar ils containers plü disferenzchadamaing, prevezza l'adattamaint invezza d'üna pauschala annuala pel servezzan da svödar il container ün inchasch individual in fuorma d'üna plomba dal Cumün chi vain francada sper la plomba da PEB üsitada vi dal container mincha jada cha'l container ha da gnir svödà. Ils affarists interessats vi d'ün container d'affar pon retrar a partir dals 3 schner 2012 las plombas dal Cumün per frs. 20.-- per plomba e las indicaziuns detagliadas in büro cumünal.“

1085 300.311.02

Iglüminaziun per concerts (baselgia)

Novas glüms per vi dals portanotas – Credit da frs. 450--

In nom da la società d'Ütil public fa duonna Leta Mosca la dumonda scha'l Cumün surpigliess ils cuosts per trais glüms da portanotas novas causa cha las glüms ch'id eiran avantman fin uossa sun ruottas. Ils cuosts per las trais glüms s'amuntan sün s-chars frs. 450.--. La quarta glüm vain sponsurada da duonna Seraina Putkammer ch'id es la sour da duonna Leta. Il Cussagl cumünal decida da vulair surtour quists cuosts causa cha'ls concerts in baseglia sun üna sporta culturala bain frequentada in nos cumün.

1086 790.581.03 Plan da quartier Flüs
Surdatta da lavur na autorisada

In connex cul plan da quartier da Flüs ha il Cumün survgni ün aquint da frs. 10'000.-- per üna lavur da falegnam cha'l Cumün nun ha surdat. Normalmaing vegnan talas lavurs surdattas a man d'offertas, tantplü chi's tratta d'ün volüm total da lavur da bundant frs. 20'000.--. In quist cas es la lavur gnüda surdatta sainz'orientaziun a las instanzas cumünalas. Quist möd da surdatta nun es correct ed il Cussagl cumünal decida, adonte cha la lavur faiva dabsögn ed es gnüda executada in uorden, da refüsar il quint e da til trametter inavò al büro d'indschgnier chi maina il proget e chi ha eir surdat la lavur in aigna cumpetenzza, cul giavüschi d'evader la chosa correctamaing.

1087 3 CULTURA E TEMP LIBER
Clavazin Bechstein sün sala da la chasa Misoc

Ün abitant nouv da Sent es in possess d'ün clavazin Bechstein da gronda qualità. Causa ch'el nun ha in sia chasa a Sent il lö toccant per quist instrumaint es quel per intant deposità pro la dita da musica Jecklin. Quist fat para puchà ed il possessur dal clavazin dumonda perquai scha'l clavazin nu chattess lö sün sala cumünala per pudair gnir dovrà per concerts, per porvas da chant e musica, ma eir per l'adöver d'instrucziun. A regard la dumonda da la sgüranza in cas chi vessan da capitar dons vi da l'instrumaint esa uschè cha'l cumün nu po integrar l'instrumaint illa polissa dal Cumün causa ch'el nun es il possessur da l'instrumaint. La sgüranza füss dunque chosa dal possessur. Il Cussagl cumünal decida perquai da comunicar al possessur cha'l clavazin chattess bainschi lö sün sala cumünala, cha'l Cumün nu possa però surtour la respunsabilità per eventuels dons causa cha la sala saja ün local public bain frequentà. Perquai füssa da stipular ün contrat d'impraist chi regla tanter oter eir la dumonda da l'adöver e da la sgüranza.

1088 942 POSSESS DA FINANZAS D'EDIFIZIS
Dumonda per pudair cumprar terrain cumünal

Sar Martin Pernet dumonda scha'l Cumün füss pront da ceder ün toc terrain cumünal da ca. 15-17 m2 vers süd da sia parcella per pudair eventualmaing realisar üna jada üna access per sia chasa main stip sco fin uossa. Pro'l toc terrain as tratta vairamaing d'ün vial chi pudess esser d'interess eir per la parcella vaschina. Causa cha'l Cussagl cumünal nu vezza la necessità da vender il toc terrain e nu vuol eir na avantagiar ad ün o a tschel vaschin decida'l da nu vulair vender insomma na il toc terrain.

1089 Orientaziuns

Il schef da turissem prelegia il rapport annual da sar Armon Nuotclà chi survaglia la rait da sendas, controlla ils stadis da las sendas e actualisescha las signalisaziuns. Il Cussagl cumünal piglia cogniziun dal rapport e da las intimaziuns fattas.

L'actuara: